

FSSA UMS Anjur Seminar Analisis Mikrodata Malaysia untuk Pelajar

Terakhir dikemaskini: Selasa, 18 September 2018 16:37 | [Cetak](#) | Jumlah paparan: 251

[Kongsi 0](#)[Syorkan 0](#)[Kongsi](#)[Tweet](#)[Share](#)

SELASA, 18 SEPTEMBER
- Fakulti Sains dan Sumber Alam (FSSA) Universiti Malaysia Sabah (UMS) menganjurkan seminar mengenai Analisis Mikrodata Malaysia dengan kerjasama Jabatan Perangkaan Malaysia.

Seminar sehari itu memberi peluang kepada kira-kira 200 pelajar dari FSSA dan Fakulti Perniagaan, Ekonomi dan Perakaunan (FPEP) untuk melihat dengan lebih jelas mengenai kepentingan mikrodata dalam kajian dan penyelesaian pelbagai isu di Malaysia.

Menurut Naib Canselor UMS, Profesor Datuk Dr. D Kamarudin D Mudin, penganjuran julung kalinya itu merupakan kesinambungan kepada Memorandum Persefahaman (MoU) yang ditandatangani bersama Jabatan Perangkaan Malaysia pada tahun 2015.

“Dengan perubahan pantas yang disebabkan oleh globalisasi dan pembangunan teknologi, terdapat peningkatan yang lebih besar dari segi permintaan data dan maklumat statistik mengenai reaksi pengendali ekonomi individu sama ada dalam perniagaan mahupun isi rumah,” ujarnya.

Tambah beliau, penggunaan mikrodata yang relevan dapat meningkatkan potensi untuk memberikan pandangan-pandangan baharu bagi menggubal dasar di Malaysia.

Teks ucapan beliau dibacakan oleh Dekan FSSA, Profesor Dr. Baba Musta.

Sementara itu, Pengarah Pusat Pengantarabangsaan dan Penglibatan Global, Profesor Dr. Ho Chong Mun yang juga merupakan Pengerusi Penganjur berkata, sebanyak lapan kertas kerja dibentangkan pada seminar kali ini.

“Hasil daripada seminar ini bukan sahaja untuk tujuan akademik tetapi juga sebagai input kepada perancangan dan pembangunan masa depan negara,” jelasnya.

Pada seminar tersebut, turut diselitkan forum bertajuk ‘Analisis Mikrodata Malaysia : Isu dan Langkah Seterusnya’ yang menampilkan tiga orang panel iaitu Pengarah Bahagian Integrasi dan Pengurusan Data Jabatan Perangkaan Malaysia, Siti Haslinda Mohd Din; Pengarah Sektor Penyelidikan Kependudukan dan Keluarga, Lembaga Penduduk dan Pembangunan Keluarga Negara (LPPKN), Azmel Mahmud serta Pensyarah Kanan Universiti Malaya, Profesor. Dr. Ong Seng Huat.